

**Partiit nunanit allanit tapiissutinik tapiissuteqartunik pissarsiaqarsinnaatitaannginnermut aamma partiit nunatta avataani najugaqartut angerlarsimaffeqartulluunniit Qallunaat Nunaanneersut Savalimmiuneersullu inerteqqummut ilanngunneqarnissaat pillugu Inatsisartut inatsisaat nr. 14, 4. februar 2025, §4b allanngortinneqarnissaanut Naalackersuisut inatsimmut allannguutissamik suliaqqaqullugit Inatsisartut aalajangiiffigissaattut siunnersuut. Siunnersuut kingusinnerpaamik UKA2026-mi saqqummiunneqassaaq.**

(Inatsisartunut ilaasortaq Pele Broberg, Naleraq)

**Siullermeerneqarneranut oqaaseqaat:**

Siullermik Naleqqamiit Pele Broberg, Naleraq, siunnersuutaanut pingaarutilimmut qutsavigerusupparput.

Siunnersuutimmi siunertarivaa, ilumoortumik nunanik allaniit aningaasanik tapiiffigineqarsinnaaneq tamakkiisumik inerteqqutaatilernissaa.

Sooq pisariaqarpa? Tamat oqartussaanagerat, Kalaallit Nunaani politikikkut allammiunik aningaasatigut sunnerneqannginnissaaq pillugu. Pingaartumillu politikikkut aningaasat atorlugit innarlerneqannginnissamut tunngassuteqarpoq. Allamiunut ilaasussaagaluarpummi Danmark nunallu allat.

Februarimi 2025 Naleraq inatsimmut taaseqataangilaq. Tassami ersarikkami sulii partiit ilaasa Danmarkimi partiinit Inatsisartunut qinersinissarput sioqqutillaarlugu taperneqartarnissartik peerusussimangikkaat.

Inatsimmi § 4 b, imm. 1, 3 allaqqasoq issuassavara:

*“Nunanit allanit tapiissuteqartunit tapiissutinik pissarsiaqarsinnaatitaannginnermut partiinit kunneqarfimmi nalunaarsorneqarsimasunit tapiissutit ilaatinneqanngillat.”*

Naleqqamiit tamanna isumaqatiginngilluinnarparput. Tassami inatsisip sukaternerata siunertaanut naapertuutinnngilluinnarmat. Nunat allat imaaginnangillat Island, Norge, nunat allat tassaapput Kalaallit Nunaata avataaniittut, tassanilu ilaapput Danmark aamma Savalimmiut.



Naleqqamiit isumaqarpugut, nunanik allaniit aningaasatigut sunnarniarneqarsinnaanerput tamakkiisumik unitsittariaqaripput. Kalaallit Nunaani politikki nunatsinniit ingerlanneqassaaq, partiinik nunanik allaniit sunnarniarneqarsinnaaneq tamakkiisumik unitsilli, politikikkut aningaasatigullu.

Naleqqamiit soorunami aamma nunarsuarmioqataassaagut. Isummersoqatigiissinnaaneq, oqaloqateqarsinnaanerlu nunarsuarmi suminganneertunilluunniit uani siunnersuummi mattunneqarnissaanut tunnganngilaq. Uani pineqartoq tassaavoq aningaasatigut politikikkullu nunat aalajangersimasuinnaat toqqaannaq aqutseratarsinnaaner at unitsinniarlugu.

Naleqqamiit isumaqarpugut, danskit partiivisa soqutigisaat allarluinnaasut, taakkuami Danmarkimi innuttaasunut sullissisuupput, inatsisiliortuupput. Marloqiusamik inissinnissaq Naleqqamiit akuerinngilarput.

Kalaallit Nunarput ukiuni qaninnerni, inatsisitigut politikikkullu tamakkiisumik pigilertariaqarparput, Naleqqamiit Kalaallisut immikkut politikkitigut namminerisamik kiffaangissuseqartumik ingerlatsivinnissarput sukataarupparput – Danskiunngilagummi, taamatulli ajorluartumik inatsisitigut immitsinnut aamma inissisimatippugut. Namminerpiaq uagut immitsinnut aallaavigerpiarluta politikikkut aalajangersuisinnaanerput, nunat allat pulaannarlutik ilutsinniit partiitsinnut sunniiniarnerat taamaatinneqartariaqarpoq.

Isumasiuisarfik *Epinion* naapertorlugu, danskinngooq 70%-iisa Nunatta naalagaaffinngornissaa tapersinngilaat! Tassa nunasiaatitut, nunaminertatut pigisamittut iperarusunngilaatigut. Taamaammat, soorunami aningaasaliisarnerat aningaasaliisinaanissaallu peerluinnarneqassaaq. Qanorluunniimmi aningaasat aalajangertarnermut sunniuteqarsinnaammata.

Naleqqamiit isumaqarpugut qinersisartut, partiit tatigisinnaasariaqaraat, tamakkiisumik nunarput sullissagaat. Apeqqutaatinnagu aningaasaliisut nunanik allaniit.

Naleqqamiit nalunngilarput, nunarsuarmioqataagattami, nunani allani nunanik allaniit aningaasaliisarneq periarfissaassannginnera aamma inatsisaasoq. Tassalu nunat soorlu makkua: Savalimmiut, Island, Norge, Åland, aamma Danmark. Torrak, maanna uagut aamma taamaaliorniarta. Immikkut Danmark aqutsiniarnissaanut periarfissinniaannarnagu.

Naleqqamiit maluginiarparput Naalackersuisut tamakkiisumik siunnersuut ilusimisut taperseraat, isumarpiaa isumaqatigalugu takusinnaallugulu.



Danmark immikkut polittikkikkut aqutsiniartarnera tamaanga killilertigu, piffissanngorpoq. Immitsinnut aallaavigaluta sunniiniartut naalagaatikkunnaarlugit politikkertalerniarta, sapinngilagut.

Naleqqamiit neriuppugut partiit amerlanerussutillit siunnersuut taperserumaaraat. Tassami nunatsinni tamat oqartussaaqataanermut, nunami maani Naalagaaffingoriartortumi, allanik aningaasatigut sunnerneqannginnissaq qulakkeertariaqaripput.

Taamaattumik Naleqqamiit naangaassuteqanngivilluta, Pele Broberg, Naleraq, siunnersuutaa taperserparput, Inatsisinullu Ataatsimiisitaliamut ingerlateqqillugu.